

Otg dunnas

32% dals ressorts da la Cumissiuin europeana manads da femnas

DA GUIU SOBIELA-CAANITZ

■ **José Manuel Durão Barroso manegiava propi quai ch'el scheva. Gist suenter sia elecziun a la presidenza da la Cumissiuin europeana (CE) ha'l declarà da giavischar almain otg dunnas tranter las 24 persunas, ina per stadi da l'Uniuin europeana (UE), che duajan occupar tschels ressorts.** Insaquants critichers han replitgà che lez giavisch saja ina declaraziun vinda, damai che mintga stadi nomineschia tgi ch'el veglia. Dentant han otg d'els tramess ina cumissaria a Bruxelles. I n'è betg stà quels che han promovì l'integrasiun dal continent avant tschinquanta onns, ni quels da sia fashada mediterrana. Dus da tschels stadis han simplamain renovà il mandat da lur cumissaria, trais han nominà ina represchentanta nova, trais da quels diesch che han aderì en matg han elegì ina dunna.

22 chaus novs

La Svezia ha confermà Margot Wallström, fin ussa cumissaria da l'ambient, oramai vicepresidente da la CE e responsabla per las relaziuns cun las instituziuns

da l'UE. I suanda la glista alfabetica da tschellas set cumissarias. Fitg relevanta per la Svizra è Benita Ferrero-Waldner, anteriura ministra austriaca da l'exteriur, oramai «cumissaria da las relaziuns exteriuras, la politica cuminaivla da l'exteriura e las relaziuns da vischinanza en l'Europa». Ella conuscha bain la Svizra e ses problems specifics, cunzunt quels che sa fan valair en l'Austria. Sco ministra austriaca da l'exteriur ha'la s'occupada blier da las relaziuns cun pajais da l'Europa mesauna, sco la Croazia e Rumenia, che giavischan l'adesiun a l'UE. Cumpetenta per l'agricultura vegn in'antieriura ministra danaisa da lez ressort, Mariann Fischer Boel. «Cumissaria dal program da finanzas e dal preventiv» vegn Dalia Grybauskaite, anteriura manadra dal medem ressort en Lituania. Danuta Hübner, anteriura ministra polacca da l'Europa, vegn «cumissaria da la politica regionala, il fond da coesiun ed il fond da solidaritad». Neelie Kros-Smit, anteriura ministra da traffic en ils Pajais bass, vegn «cumissaria per dumondas da concorrenza» grazia a sia gronda experienza da l'eco-

nomia privata. La Luxemburgaisa Viviane Reding, cumissaria da cultura sut Romano Prodi, surpiglia oramai l'infurmasziun e las medias. La Lettonia trametta Ingrida Udre, anteriura parsura dal parlament naziunal, che surpiglia las taglias e l'uniun da duana. Reding, Wallström ed il vicepresidente Günter Verheugen (Germania), oramai cumissari da l'industria, èn ils unics veterans da l'equipa da Prodi, sper 22 chaus novs. Ferrero-Waldner chatta dus anteriurs ministers da l'exteriur tranter ses collegas masculins novs, numnadamain László Kovács (Ungaria), cumissari da l'energia e la segirtad nucleara, e Louis Michel (Belgia), cumissari da l'agid al svilup. Il Vallon Michel, bun conuschider da l'Africa naira e cunzunt las anteriuras colonias belgas, ha sa «distingui» en ils onns novanta sco manader da la campagna encunter l'Austria, in'acziun mal ponderada che n'ha gidà nagut. Las otg cumissarias e lur deschet collegas masculins duain uss avair quitad da metter ad ir acziuns bain ponderadas areguard la situaziun economica e sociala da l'Europa.